

7 Udal Administrazioa

IBARRAKO UDALA

Animaliak edukitzea eta babestea arautzen duen udal ordenantza behin betiko bihurtze.

IBARRAKO UDALA

Iragarkia

Jendaurrean jarrita egoteko arauzko epea inolako kexarik eta oharrik aurkeztu gabe igaro ondoren, 2013ko -otsailaren 6an udalbatzarrak egindako ohiko osoko bilkuran hartutako hasierako erabakia indarrean jarri da eta behin betiko bihurtu da. Erabaki horren bidez, Ibarako AASSetako 1.1 JUko Euskal Herria 18-2 zk.ko zuzkidura-bizitokietako zerbitzu publikoak arautzen dituen erregelamenduari eta deialdiaren oinarriei hasierako onarpena eman zitzaion. Jarraian araudiaren testu osoa argitaratu dugu, apirilaren 2ko 7/85 Legeak, Toki-administrazioaren Araubidearen Oinarriak arautzen dituenak, 70.2. artikuluan xedatutakoa bete dadin.

Ibarra, 2013ko apirilaren 2a.—Jesus Peñagarikano Labaka, Alkatea.

(363) (3223)

ANIMALIAK EDUKITZEA ETA BABESTEA ARAUTZEN DUEN UDAL ORDENANTZA

SARRERA

Ordenantza hau Toki Jaurbidearen Oinarriak Arautzeko Legeak eta Animaliak Babesteari buruzko urriaren 29ko Euskal Autonomi Erkidegoko 6/1993 Legeak eta gainerako xedapen aplikagarriek Udal honi esleitzen dizkioten ahalmenen indarrez egin da.

AZALPENA

Hau da ordenantza honen asmoa: Mota guztietako animalien edukitzea arautzea, bai konpainiakoena bai konpainiakoak ez direnena, animalien eta pertsonen arteko elkarbizitza bateratzeko helburuz, ingurunearen osasunerako eta pertsona nahiz ondasunen lasaitasun, osasun eta segurtasunerako izan daitezkeen arriskuak saihestuz.

Halaber, animaliek tratua, higienaren, elikaduraren, babesaren, exhibizioaren, garraioaren eta identifikazioaren ikuspuntutik jaso beharrezko gutxienezko arreta ere arautzen du.

Animaliak aldi batez edukitzen dituzten establezimenduek bete beharreko arauak ezartzen ditu, bai eta albaitaritzako kontsultategi, klinika zein ospitaleen eta animalia saltokien ezaugarriak eta baldintzak ere.

Azkenik, ikuskapen eta zaintza neurriak zehazten ditu, arau-haustek eta zigor aplikagarriak sailkatzen ditu eta prozedura zigortzaile egikaritzaila ezartzen du.

I. TITULUA

HELBURUA, DEFINIZIOAK ETA EZARPEN EREMUA

I KAPITULUA. EZARPEN EREMUA ETA HELBURUAK

1. artikulua.

Ordenantza honen ezarpen eremu geografikoa Ibarako Udalerri osoa da.

2. artikulua.

Ordenantza honen xedea da udalerrian dauden etxeko animaliak, animalia etxekotuak eta animalia basatiak babesteko, elkarbizitzeko, edukitzeko, erabiltzeko, erakusteko eta merkaturatzeko arauak jartzea, udalerrian zentsatuak edo erroldatuak egon ala ez egon, jabe nahiz edukitzaileak bizi diren lekuan bizi direla.

Horretarako animaliek tratuari, higienari, zainketari, identifikazioari eta babesari dagokionez jaso beharreko arreta minimoak zein diren ezartzen da eta, halaber, establezimendu berezituetan, osasun-arretan, merkatura-tzerakoan eta saltzerakoan bete beharreko arauak ere ezartzen dira.

Honako arlo hauek ordenantza honen ezarpen eremutik kanpo daude, bestelako araudi berezia dutelako:

- a) Ehiza.
- b) Arrantza.
- c) Basoko faunaren babesa eta kontserbazioa bere ingurune naturalean.
- d) Zezenekin eta/edo bigantxa, idi eta zaldiekin egiten diren festak.
- e) Animaliak ikerkuntza eta bestelako helburu zientifikoetarako erabiltzea.
- f) Hegazti-tiroko lehiaketak.
- g) Hainbat herri-kirol, elementunagusia etxeko animaliak direnean.
- h) Arriskutsuak izan daitezkeen animaliak edukitzea, ordenantza honetan araututako zehaztasunak salbu.

II. KAPITULUA. DEFINIZIOAK

3. artikulua.

1. Konpainiako animalia:

Gizakiak mantentzen duen animalia, batez ere etxean, etxeko animalia zein animalia basatia izan, eta jostatzeko, hezteko nahiz apaintzeko, gordetzeko edo babesteko helburuz edukitzen dena, inolako irabazteko asmorik gabe.

2. Ustiaketarako animalia:

Gizakiak irabazteko asmoarekin mantentzen dituen animaliak, irabaziak zuzenean animalien ustiaketatik lortzen direla nahiz haiengandik eskuratutako produkzioen ustiaketatik lortzen direla.

3. Basa animalia gatibutzan:

Berez basa-animaliak izanda gatibutzan jaio diren animaliak edo naturan libre jaio arren, gatibutzan dauden animaliak, baina gatibutzaren helburua ez bada animalia etxekotzea edo heztea

4. Animalia abandonatua:

Animalia abandonatutzat jo dira jabe edo helbide ezagunik ez dutenak, animalia-aren datuak jakiteko sistematik ez dutenak eta erroldan ez daudenak.

Era berean, animalia abandonatutzat joko dira ondorengo egoeretan daudenak: Erroldan egon arren animalia-aren jabeak ez badu arautegiak ezarritako epe barruan haren desagertzearen salaketarik egin, edota bide publikoan jaberik gabe dabilena.

5. Animalia arriskugarria:

Ordenantza honi dagokionez, eta segurtasun publikoari buruzko legerian xedaturikoa baztertu gabe, ondoko hau hartuko da «animalia arriskugarritzat»: Udal agintari eskudunek banaka halakotzat jo eta hala katalogaturiko txakurra. Horretarako irizpide objektibo batzuk hartuko dira kontuan, hala nola salaketarik jaso izana, portaera oldarkor edo erasokorra agertu izana, edo pertsona eta/edo animalientzako arriskua agerian jartzen duen beste edozein inguruabar.

6. Arriskutsua izan daitekeen animalia:

Oro har, fauna basatiko animaliak izanik etxeko edo konpainiako animalia gisa erabiltzen direnak, beren oldarkortasuna alde batera, pertsona edo beste animaliei heriotza edo lesioak eta gauzei kalteak eragiteko ahalmena dutenak.

Beren oldarkortasuna, tamaina edo barailaren potentziarengatik pertsona edo beste animaliei heriotza edo lesioak eta gauzei kalteak eragiteko ahalmena duten etxeko edo konpainiako animaliak ere, bereziki txakurrak, arriskutsuak izan daitezkeen animaliatzat hartuko dira. Arauz zehaztuko da zein diren.

Horrelako animaliak edukitzea legeria bereziaren bidez arautuko da (abendua 23ko 50/1999 Legea; martxoaren 22ko 287/2002 Errege Dekretua, eta aplikagarria den gainerako legeria).

II. TITULUA

ARAU OROKORRAK

III. KAPITULUA. IZAERA OROKORREKO ARAUAK

4. artikulua.

Orokorrean baimendu egiten da etxe partikularretan konpainiako etxeko animaliak edukitzea, baldin eta - etxeak, etxeko instalazioek eta animalien kopuruak zein tamainak horretarako aukera ematen badute osasunaren eta garbitasunaren aldetik, eta auzokideentzat, animalientzat edo beste edonorentzat arrisku egoerarik edo eragozpenik sortzen ez baldin bada.

Debekatua dago balkoietan, garajeetan, pabiloietan, sotoetan, zabaltzetan, lorategietan edota bestelako edozein lokaletan animaliak edukitzea, estabulatzeta edo erdi estabulatzeta, baldin eta animaliek auzokide zein oinezkoei beren usain, zikinkeria, ulu edo zaunkekin traba egiten badiete.

Salbuespen gisa txakurrak industria pabiloietan eduki daitezke, beti ere jabeek behar bezala zainduta baldin badituzte (osasun baldintza guztiak beteta), herri guneak zapaltzen ez badituzte, legeak ezarritako uhalekin lotuta badaude eta zarata, usain, zikinkeria, ulu edo zaunkagatik molestatzeko ez badute. Enbarazuak sortzen badituzte eta frogatutako salaketak baldin badaude ez da onartuko kalte edo eragozpenak sortzen dituen animaliarik.

Era berean debekatua dago txakurrak eremu ez urbanizagarrian dauden baratze eta antzekoetan edukitzea, eremu horiek baserri edo landetxeen erabilerarako lursail itsatsiak ez badira behintzat.

5. artikulua.

Debekatua dago hirigunean ustiaketa-animaliak hazteko helburuz edukitzea, eta ezin izango dira estabulatu - etxe partikular, terraza, zabaltza, ganbara, soto, trasteleku, bodega, patio eta antzekoetan.

Era berean debekatuta dago ustiaketarako animaliak ukuilaratzea herri lurretan udalaren baimenik gabe.

Halaber, ustiaketarako hazitako edozein animalia ustiaketa erregistroan izen emanda egongo da.

6. artikulua.

Erabat debekatua dago bide publikoan eta orubeetan egon daitezkeen usoei eta abandonaturiko animaliei – txakurrei, katuei, eta abar.– elikagaiak ematea.

7. artikulua.

Basa animaliak parke, zoologiko edo antzeko helburua duten bestelako lekuetatik kanpo edukitzeko indarrean dagoen legeria bete beharko da kasu bakoitzean, eta jabea arduratuko da auzokideentzat inolako arrisku edo eragozpenik ez sortzeaz. Horregatik debekatua dago animalia hauek solte lagatzea gune irekietan edo jendea dabilen lokaletan.

8. artikulua.

Animalien jabeak edo edukitzaileak behartuta daude animaliei janari eta zainketa egokia ematera, gaixotasunen tratamendua dela zein osabidea dela, animaliak ahalik eta ongien bizitzeko, bai eta agintarietara ezarritako administrazio neurriak zein osasunaren prebentzioari buruzkoak betetzera ere. Horiez gain, animalia mota bakoitzak daukan ezaugarrien arabera bizitokia eman beharko diete jabeek animaliei.

9. artikulua.

Animaliak ondo babestuak egon daitezen, erabat debekatuak daude:

1. Animaliak bortizkeriaz edo substantzia toxikoak emanez akabatzea, bide zein gune publikoetan substantzia toxikoak gordailatzea eta norbere zein inoren animaliak zauritzea, ankerkeriaz tratatzea edo tratatu txarrak ematea, etxeko animalia, animalia etxekotua zein basa animalia izan.
2. Animaliak antzerki, diskoteka, pelikula edo propaganda jardueretan erabiltzea, baldin eta erabilera horren ondorioz, animaliak sufritu edo mina hartzen bada edota degradatzen bada.
3. Animalien arteko borroka-saioak, publikoak zein pribatuak, baldin eta bertan animaliak akabatu, zauritu, izutu eta erasotzen badira.
4. Animaliei gorputz atalen bat moztea, ez bada, behintzat, albaitariaren kontrolpean helburu terapeutikoz, arrazoi funtzionalez edo arrazaren ezaugarriari eusteko egina.
5. Espreski debekatzen da animaliak abandonatzea.
6. Adin txikikoei animaliak saldu, laga edo ematea.
7. Animalien salmenta ibiltaria, baimendutako merkatu eta azoketan izan ezik.
8. Animaliak administrazioaren kontrolik gabe klinika eta laborategiei saltzea.
9. Alkohola, drogak eta botikak ematea edo kalte fisikoak zein psikikoak eragin diezazkien edozein manipulazio artifizial egitea, bereziki lehiaketetan errendimendua handitzeko bada.
10. Espezie babestuetako animaliak saltzea, edukitzea eta erakustea, arlo honetako legeria kontuan izan gabe.

III. TITULUA

KONPAINIAKO TXAKURRAK ETA KATUAK

IV. KAPITULUA. ZENTSUA ETA IDENTIFIKAZIOA

10. artikulua.

Txakur-jabe edo edukitzaileek derrigorrez identifikatu eta erroldatu beharko dituzte beren txakurrak, txakurra

jaio edo erosi den momentutik hilabeteko epean. Berdin egingo da bestelako edozein konpainiako animalia bada ere.

Animaliek beren zentsu identifikazioa eraman beharko dute beti nahitaez.

11. artikulua.

Animaliari inplante elektroniko bat jarriko zaio identifikatzeko, Eusko Jaurlaritzaren Nekazaritza eta Arrantza Sailak 1993ko maiatzaren 25eko 109/93 Aginduan animalien identifikazioaz xedatutako moduan.

12. artikulua.

Udalak txakurren errolda bat izango du, konektaturik egongo dena Animaliak Identifikatzeko Gipuzkoako Lurralde Erregistroarekin, Gipuzkoako Foru Aldundiko Abeltzaintza Zerbitzuan.

Udala datu-basea urtero eguneratua edukitzeaz eta datuen ezkutukotasunaz arduratuko da.

13. artikulua.

Gainera, txakur jabeek txakurraren osasun liburuxka izan beharko dute, Nekazaritza eta Arrantza sailburuak 1993ko maiatzaren 25ean emandako Aginduaren 5. artikulua eta hura garatzeko araudiak hala egin dadila eskatzen baitute.

Jabeak, txakurrak sor ditzakeen kalteei aurre egiteko, erantzukizun zibilaren aseguru-poliza bat sinatu beharko du, eta liburuxkan urteko aseguru ordaindu izana frogatzen duen agiria jaso beharko du. Liburuxka edo identifikazioa galduz gero berehala jakinarazi beharko du, eta berria egin.

14. artikulua.

Animalien jabeek edo edukitzaileek albaitariari jakinarazi beharko diote heriotzagatik izandako bajak, eta albaitariak horren berri emango dio Udalari edo dagokion Lurralde Erregistroari, heriotza gertatzen den egunetik kontatzen hasita 10 eguneko epean.

15. artikulua.

Animalia lapurtu edo desagertuz gero, salaketa jarri beharko da 24 orduko epe barruan eta hori egin ondoren, gertatutakoaren berri zuzenean emango zaio Lurralde Erregistroari, 10 eguneko epean.

Arriskutsuak izan daitezkeen animalien kasuan, animalia lapurtu edo galduz gero salaketa jarri beharko da, goian aipatutako epean, eta jabeak arriskutsuak izan daitezkeen animalien udal erroldako arduradunari gertatutakoaren berri eman beharko dio, gehienez ere 48 orduko epean.

16. artikulua.

Txakur-jabeak edo edukitzaileak etxez aldatzen badira edo txakurraren jabetza eskualdatzen badute, 10 eguneko epea izango dute albaitariari eta dagokion Lurralde Erregistroari horren berri emateko.

17. artikulua.

Animaliaren jabeak ordainduko ditu identifikazioa, osasun liburuxka eta erroldan izena ematea.

18. artikulua.

Ordenantza honen arabera abandonatutzat jotzen diren animaliak dagokion udal zerbitzuak edo horretarako kontratatutakoak jasota edukiko dituzte.

19. artikulua.

«Animalia arriskugarritzat» sailkaturiko txakurren kasuan, derrigorrezkoa da hala sailkatua dagoela agertzea

Txakurren Osasun Liburuxkan eta Euskadiko Autonomia Erkidegoko Animalien Identifikazio Elektronikoko Erregistro Orokorrean.

Animalia horiek «animalia arriskugarria» gisa sailkatuta daudela adierazten duen plaka eraman beharko dute beti lepotik zintzilik ondo ikusten dela.

20. artikulua.

Abenduaren 23ko 50/1999 Legeak, hain zuzen arriskutsuak izan daitezkeen animaliak izateko erregimen juridikoa arautzen duenak, eta hori garatzekoa den martxoaren 22ko 287/2001 Errege Dekretuak zehazten dituzten animalien jabeak, hazleak, zein edukitzaileak, behartuta daude haiek arautegiak zehazten duen eran identifikatu eta erroldatzeko.

V. KAPITULUA. ANIMALIEN OSASUN KONTROLA

21. artikulua.

Animalia bati gizakientzat zein gainontzeko animalientzat kutsakorra den gaixotasunen bat diagnostikatzen badiote, edo horrelako gaixotasun sintomak baditu, edo pertsona nahiz animalia bati hozka egin badio, Udalak agindu dezake animalia hori zaintzapean eta behaketan jartzea.

Animaliaren batek pertsonentzat nahiz animalientzat kutsakorra den gaixotasunen bat badu (albaitari kolegiatu batek diagnostikatua) eta albaitariaren iritziz animalia akabatu egin behar bada, baimendutako sistemaren bat erabiliz akabatuko da, eta gastuak jabeak ordaindu beharko ditu. Horiez gain, gaixotasun kroniko sendaezinak edukirik jabeek behar bezala zaintzen ez dituztenak ere akabatu egin beharko dira.

22. artikulua.

Foru Aldundiko departamentuek edota Eusko Jaurlaritzako Nekazaritza eta Arrantza Sailak egoki ikusten dituen neurriak hartuko ditu gaixotasun-agerraldiak badaude edo neurri horiek hartzea eskatzen duten bestelako egoerarik sortzen bada, eta neurri horiek animalien jabeek bete beharko dituzte, pertsonentzat eta gainontzeko animalientzat kaltegarriak izan ez daitezzen.

23. artikulua.

Pertsona bati edo gehiagori hozka egin eta lesioak eragin dituela frogatu zaion animalia Gipuzkoako Lurraldean animalia haginkari entzat ezarrita dagoen indarreko zaintza- eta behaketapean jarriko da.

24. artikulua.

Aipaturiko zaintza eta behaketa aurrera eramango da, hozkada jasan duen pertsona edo bere ordezkariak Udalean hozkadaren salaketa bat jarri beharko du.

VI. KAPITULUA. ANIMALIAK LEKU PUBLIKOETAN

25. artikulua.

Hiriko bide eta leku publikoetan eta eraikin kolektiboetako guztien erabilerarako zatietan, txakurrak kontrolpean eta uhal batez loturik eduki behar dira. Uhalak egokia izan behar du animalia baten ezaugarrietarako.

26. artikulua.

«Animalia arriskugarria» eta «arriskutsuak izan daitezkeen animalia» gisa sailkatutako animalien kasuan, jabeek, hazleek edo edukitzaileek, aipaturiko baldintza orokorrez gain eta herri segurtasunari buruzko legerian xedaturikoez gain, ondoko baldintza berezi hauek bete behar dituzte:

- a) Txakurra dagoen leku edo esparrua segurtasun sistema egokiaz hornitu behar da animaliak ihes egitea eragozteko edo haurrek bertara erraztasunez sar ez daitezen, auzokoentzat, kaletik pasatzen direnentzat edo gainerako animalientzat inolako arriskurik ez dagoela bermatzeko.
- b) Debekaturik dago animalia lotzeko luza daitezkeen uhalak erabiltzea.
- c) Bide publikoetan, eraikin kolektiboetako guztien erabilerarako zatietan eta, oro har, leku publikoetan, derrigorrezkoa da txakurrak une guztietan muturrekoa eramatea, bakoitzaren tipologia kontutan hartuta egokia duena.
- d) Animalia arriskugarriztat» katalogaturik dauden txakurrek hori adierazten duen identifikazio plaka bat eraman behar dute, betiere agerian eta idunekotik loturik, araututako modelokoa.
- e) «Animalia arriskugarriztat» katalogaturik dauden txakurrek ezin dute inola ere parte hartu txakur erakusketa, lehiaketa edo bestelako gertakizunetan.

27. artikulua.

Debekatua dago animaliak honako leku hauetan sartzea:

- a) Edozein motako elikagaiak fabrikatu, gorde, garraiatu edo saltzeko lekuak.
- b) Ikuskizun publiko, kultural, kirol eta jostetako lokalak, igerileku publikoak eta osasun zentroak. Bakarrik sartu ahal izango dira leku horietan animalien lehiaketak edo ikuskizunak antolatzen direnean.
- c) Ikastetxeak, salbu eta heziketa prozesuan behar badira, eta kasu honetan zuzendariaren edo zentroko arduradunaren erantzukizuna izango da.

Leku horien guztien titularrek debeku hau adierazten duten seinaleak ipini beharko dituzte ondo ikusteko moduan.

28. artikulua.

Ostalaritza arloko establezimendu publikoen jabeek, hau da, taberna, pentsio, jantoki, hotel, kafetegi edo antzekoen jabeek debekatu ahal izango dute, hala nahi izanez gero, bertan txakurrak sartzea. Txakurrak sartuz gero, ordea, derrigorrez eskatu beharko dute txakurrek identifikazioa izatea, uhalarekin lotuta egotea eta muturrekoa ipinita, txakurraren ezaugarriek eta izaerak halakorik eskatzen badute. Bestalde, txakurrek ezin izango dute gaixotasun sintomarik eduki edo zikinak egon. Ezin izango da txakurrik sartu janaria egin eta manipulatzeko den lekuetan.

29. artikulua.

Toki komunitario pribatuetan, hau da, kultur elkarte, jolas elkarte, auzokideen komunitateen erabilerarako leku eta abarretan animaliak sartu eta egon ahalko dira, baldin eta entitate horiek dituzten arauak onartzen badituzte eta arauak betetzen badituzte.

30. artikulua.

Gida-txakurren laguntzaz ibiltzen diren pertsonentzat ez dago debekatua aurreko artikuluetan adierazitakoa.

31. artikulua.

Debekatua dago txakur-gorozkiak bide eta plaza publikoetan, haur parkeetan, lorategietan, eta oro har, leku apaingarrietan edo jendea biltzen den lekuetan uztea.

Horregatik, txakurrekin doazen pertsonen gorozkiak galtzadara eraman beharko dituzte, espaloiaren zintarri ondora eta estoldaren hustubideetatik ahalik eta hurbilen laga.

Txakurrak gorozkiak espaloian edo oinezkoen igarobideetan lagatzen badu, txakur-jabeak edo txakurra daramanak dauka jasotzeko ardura. Horretarako poltsa iragazgaitzetan sartu, poltsa itxi eta zakarrontzietara edo Udal zerbitzuek adierazitako beste tokietara botako du, etxeko zabor-poltsan ere bota ahal du udal zabor-biltzaileek eraman dezaten eta estolderia-sareko hustubideetan ere bota dezake.

Txakur batek bide publikoa zikintzen badu, herritarrek eskubidea izango dute txakur-jabeari edo eramaileari zikindutakoa garbi dezala eskatzeko.

32. artikulua.

Animalia bide publikoetan egon edo ibiltzen bada, eta norbaiti eta ondasun publiko zein pribatuei kalterik egiten badie, jabea edo hartaz baliatzen dena izango da erantzulea.

VII. KAPITULUA. ANIMALIAK JASOTZEKO ZERBITZUA

33. artikulua.

Hildako animaliak:

Bide eta errepide publikoetan agertzen diren animalia hilen gorpuak Udalak edo zerbitzua kudeatzen duen enpresak jasoko ditu. Ez ditu jasoko, ordea, Lurzoruaren Legearen arabera lurzoru hiritarrezin kalifikatutako lekuetakoak, udal lurrak ez badira behintzat. Egoerak aginduta, udal zerbitzuek animalia hildakoren bat jabetza pribatuko lurren batetik jaso behar badute, sortutako kostuak animalia jabeak hartuko ditu bere gain, eta hala ez balitz lurraren jabeak.

34. artikulua.

Abandonatutako txakur eta katuen kontrola:

1. Herrian zehar edo herri inguruko bideetan zehar jaberik edo eramailerik gabe dabilen animalia jaso egingo da, eta dagokion zerbitzura eramango, propioa nahiz itundua dela, udal administrazioak eskatuta.
2. Identifikaziorik gabeko animaliak jasota edukitzeko epea gutxienez 30 egun naturalekoa izango da. Eta epe horretan inork ez badu haren galde egin, ondoko hauetakoren bat egin ahal izango da: Animalia jabe egin, beste norbaiti eman edo hura hil.

Animaliak identifikaziorik baldin badarama haren jabeari animalia jaso edo erretenitu dela jakinaraziko zaio eta jabeak 7 egun baliadun izango ditu hura berreskuratzeko. Animalia zentroan jasota egon den artean izandako gastuak jabeak ordaindu beharko ditu. Epe hori igaro eta jabeak animalia berreskuratu ez badu, aurreko idatz zatian adierazitakoa egingo da animaliarekin.

3. Albaitariaren txostenak animalia egoera zein osasuna txarrak direla eta bere izaera arriskutsua dela adierazten badu, animalia akabatze epea aldatu egin ahal izango da, eta presaz akabatu ahal izango da.
4. Zerbitzu propio nahiz itunduan utzitako animalia identifikatuak, jabeak aldeztatik haien jabetzari espreski uko egin badiote, animaliak eskatzen dituen edonori eman ahal izango zaizkio 30 eguneko epean, gehienez ere. Horrelakoetan animalia uko egin dionak ordaindu beharko ditu jasota egon den bitartean sortutako kostuak.
5. Lakiolariak lanean ari diren bitartean Agintaritzaren Agentetzat hartuko dira, ondorio guztietarako.

IV. TITULUA

ANIMALIEN ALDI BATERAKO MANTENIMENDUAZ ARDURATZEN DIREN ESTABLEZIMENDUENTZAKO ARAUAK

35. artikulua.

Titulu honen barruan sartzen dira:

- a) Hazkuntza eta hezkuntza zentro eta aterpetxeak.
- b) Animaliak saltzeko lokalak.
- c) Albaitaritzako kontsultategiak, klinikak eta ospitaleak.
- d) Udalerrietako aldi baterako jarduerak (zirkoak, zoo ibiltariak).

36. artikulua.

Jarduera horiek guztietarako udal lizentzia beharko da, eta lizentzia hori sailkatutako jardueren araudian ezarritakoaren arabera izango da.

VIII. KAPITULUA. -HAZKUNTZA ZEIN HEZKUNTZA ZENTROAK ETA ALDI BATERAKO ATERPETXEAK

37. artikulua.

Hazkuntza zentroek, hezkuntza zentroek eta animalien egoitzek animalia sarrera eta irteeren erregistro liburua eduki beharko dute. Liburua arlo honetan eskumenak dituzten osasun agintarien esku egongo da.

38. artikulua.

Eraikuntzek, instalazioek eta ekipoen giro garbia sortu beharko dute, bertan dauden animaliak babestuko dituzte eta egin behar izaten diren jarduerak zoo-sanitarioak erraztuko dituzte. Halaber animaliak erraz manipulatzeko aukerak eman beharko dira eta animalien izaerari egokituta egon beharko dute, hartara animaliei bizi-baldintza egokiak eskaintzeko.

39. artikulua.

Zentroek barruko saneamendu-sarea eduki beharko dute eta gorozkiak zein ur zikinak desagerrarazteko neurri zuzentzaile egokiak edukiko dituzte, arlo horretako araudiak jasotakoaren arabera, osasun publikoan zein inguruko osasun egoeran egon daitezkeen arriskuak gutxitzeko.

Zentroetan edateko ura egon beharko du, bertan dauden animaliek zein pertsonak edan dezaten.

40. artikulua.

Zentroetako esparruak, lokalak zein kaiolak erraz garbitu eta desinfektatzeko moduan eta materialekin eraikiko dira. Esparru horiek gutxienezko azalera izango dute, animalia tamainaren arabera izango dena, animalia ongizatea bermatzeko.

41. artikulua.

Lokalak, animaliekin kontaktuan dauden tresnak eta animaliak garraiatzeko ibilgailuak, halakorik balego, garbitu eta desinfektatzeko tresnak zein baliabideak eduki beharko dituzte.

42. artikulua.

20 animalia kaiola bat eduki beharko dute gutxienez, gaixorik dauden animaliak eta gaixorik dauden susmoa dagoenean, bertan isolatu, bahitu eta behatzeko. Kaiola hauek erraz garbitu eta desinfektatzeko modukoak izango dira.

Era berean, animalien gorpuak eta material kutsagarriak ezabatu edo desagerrarazteko bitarteko egokiak eduki beharko dituzte.

43. artikulua.

Zentro hauek garbitasun eta profilaxi programa definitu bat egin beharko dute albaitari tekniko batek oniritzia emanda, eta honako hau jasoko du gutxienez: Behar den bakoitzean eta, gutxienez, sei hilabetean behin, animaliekin kontaktuan dauden materialak eta lokalak sakon desinfektatuko direla eta intsektuen eta arratoien kontra fumigatuko direla.

Albaitari-ikuskatzaile ofizialek instalazioak zein bertako animalien egoera ikuskatu ondoren osasunaren eta garbitasunaren aldetik akatsen bat ikusten badute, jardueraren titularrei akatsak zuzentzeko behar diren neurriak hartzeko eskatuko diete.

IX. KAPITULUA. ANIMALIAK SALTZEKO LOKALAK

44. artikulua.

Animaliak saltzen dituzten establezimenduek albaitari-aholkulari bat eduki beharko dute. Albaitari-aholkularia animalien sarrera eta irteerako erregistro-liburuaz arduratuko da, eta honako hauek ere jaso beharko dituzte bertan: Mota, arraza, adina, jatorria, inportazio-baimenaren zenbakia, sarrera eta irteerako data, animaliaaren helburua eta bestelako datu interesgarriak. Liburuak udaleko Osasun Agintaritzaren esku egon beharko du.

Bizirik dagoen animalia saltzen duenak animaliaaren jatorria, ezaugarriak eta osasun egoera jasotzen dituen agiri bat eman beharko dio erosleari. Edonola ere, nahiz eta saltzaileak agiri hori eman, animalia salmentaren unean detektatu gabeko gaixotasunen bat inkubatzen ari bazen, saltzaileak horren erantzukizuna izango du.

45. artikulua.

Animaliak saltzen dituzten lokaletako esparru, kaiola edo bestelako tokiak egokiak izan beharko dira, bertan erakusgai dauden animalien egoera egokia izan dadin.

46. artikulua.

Inoiz ere ezingo da babestua dagoen faunako animaliarik komertzializatu.

X. KAPITULUA. -ALBAITARIEN KONTSULTATEGIAK, KLINIKAK ETA OSPITALEAK

47. artikulua.

Animalia txikientzako kontsulta klinikoak eta osasun tratamenduak eskaintzen dituzten anbulatorio izaerako establezimenduak, honela sailkatuko dira: Albaitari Kontsultategia, Albaitari Klinika eta Albaitari Ospitalea.

1. Albaitari Kontsultategia: Gutxienez itxarongela eta kontsulta gela eduki behar ditu eta bertan sendaketa eta kirurgia ebakuntza txikiak egin daitezke.
2. Albaitari Klinika: Gutxienez honako hauek eduki behar ditu: Itxarongela, kontsulta gela, ebakuntzak egiteko gela, instalazio erradiologikoak, laborategia eta suspertze-atalak.
3. Albaitari Ospitalea: Albaitari Kliniketik dituztenez gain, ospitaleratze-gela ere eduki behar du, eta bertan 24 orduko osasun-zainketa eta ospitaleratuta dauden animalien eten gabeko zainketa ziurtatu behar dute.

48. artikulua.

Establezimendu horiek guztiek udal-lizentzia beharko dute, eta isolatuta dauden eraikinetan edo beheko plantan dauden lokaletan kokatu ahal izango dira, albaitari-ospitaleak izan ezik. Edonola ere, debekatua dago etxebizitza erabilerako eraikin batean horrelako jarduerarik jartzea.

49. artikulua.

Albaitari ospitaleek honako baldintza hauek bete beharko dituzte baimenak lortzeko: Etxebizitzetatik aldentuta egongo dira, aparteko eraikin batean. Eraikina itxita egongo da, eta gune librea ere izango du,

ospitale-plaza bakoitzeko 20 m².

50. artikulua.

Debekatua dago honako leku hauetan aldi baterako zein aldizkako albaitari-kontsultategia edukitzea: Merkataritza establezimenduetan ezein bertako lokalen batean (botiketako bulegoetan, janari dendetan, ostalaritzako lokaletan eta jantokietan bereziki), bai eta animaliak saltzeko lokaletan zein animaliak babesteko elkarteen lokaletan ere.

51. artikulua.

Ekipamenduek zein instalazioek sektoreko arautegia betetzeaz gain, honako hauek ere bete beharko dituzte:

1. Lurzorua iragazgaitza, erresistentea eta garbigarria izango da.
2. Parametro bertikalak lurzortik gutxienez 1,75 m-ko altuera arte egongo dira alikatatuta. Gainontzekoen eta sabaiaren materialak erraz mantendu, garbitu eta desinfektatzekoak izango dira.
3. Edateko ura, ur hotza eta beroa izango dituzte (gehienez 82.º C-ra artekoa).
4. Hildako animalien gorpuak kentzeko baimendutako bideak erabiliko dira.
5. Bertan sortutako hondakinak kentzeko, ontzi txikiak erabiliko dira eta une bakoitzean indarrean dauden arauak bete beharko dituzte.
6. Animalien gorozkiak zabor-poltsa iragazgaitz eta itxietan desagerraraziko dira.
7. Instalazio, tresna eta ibilgailuen garbiketa, desinfekzio eta desinfektazio-lanak era sistematiko, periodiko eta jarduerak aginduko duen aldietan egin behar dituzte bertako langileek. Horrez gain, eta urtean behin - gutxienez, lokala ofizialki baimendutako enpresa batek desinfektatu eta desinsektatuko du.

52. artikulua.

Albaitari klinika, kontsultategi edo ospitale bat ireki eta funtzionamenduan jartzeko beharrezkoa izango da Zuzendaritza Teknikoak albaitari profesional kolegiatu bat edukitzea eta establezimenduan burutuko diren jarduera guztiak lanbidean aritzeko baimendutako kolegiatu gaituen bidez egitea.

XI. KAPITULUA. -ALDI BATERAKO JARDUERAK. (ZIRKOAK, ZOOAK, ERAKUSKETA MUGIKORRAK, ETAB.)

53. artikulua.

Aldi baterako jarduerak une bakoitzean indarrean dauden udal-baimenak beharko dituzte.

54. artikulua.

Era berean, hainbat osasun eta garbitasun baldintza bete beharko dituzte, jarduera finkokoek dituztenen antzekoak, baina aldi baterako jarduerentzat ezarritako salbuespenekin batera.

55. artikulua.

Honako agiri hauek guztiak eguneratuak eduki beharko dituzte: Baimenak, ziurtagiriak, jabetzari buruzko gainontzeko betebeharrak eta jardueran parte hartzen duten animalien osasun zein jatorri ziurtagiriak.

V. TITULUA

ZIGOR-ERREGIMENA

XII. KAPITULUA. ARAU-HAUSTEAK

56. artikulua.

Ordenantza honi jarraituz, arau-haustea arin, larri eta oso larrietan sailkatuko dira, osasunerako dituzten arriskuak, arduragabekeria maila, sortutako kaltearen larritasuna eta berriro egin ote diren kontuan izanda.

A. Arau-hauste arinak izango dira:

— Errolda identifikaziorik gabeko konpainiako animaliak edukitzea, identifikatuta egotea derrigorrezkoa bada.

— Animaliak garraiatzea Lege eta Erregelamenduetan ezarritakoa bete gabe.

— Animalien gorozkiak bide zein plaza publikoetan, haur parkeetan, lorategietan, leku apaingarrietan eta pertsonak ibiltzeko lekuetan uztea.

— Animaliak ondo zaindu eta begiratu ezin diren lekuetan edukitzea.

— Animaliak laidoztatzea.

— Ordenantza honetan zein bestelako lege eta araudietan xedatutako betebeharrak eta debekuak ez betetzea, egin den arau-haustearen izaera dela eta bestelako kalifikazioaren bat duen kasuetan izan ezik.

B. Arau-hauste larriak izango dira:

— Garbitasun eta osasun egoeraren aldetik egokiak ez diren lekuetan animaliak edukitzea, janaririk eta beharrezko osasun asistentziarik gabe.

— Animaliak antzutea, gorputz atalen bat mozte eta akabatzea albaitariaren kontrolik gabe edo legeek zein araudiek ezarritako baldintza eta eskakizunetan ezarritakoaren kontra.

— Ez txertatzea eta derrigorrez eman beharreko tratamenduak ez ematea.

— Animaliak baimenik gabe saltzea.

— Ordenantza honen ezarpen eremuan dauden animaliak aldi batean edukitzea, hazi edo saltzea, Legeek zein Araudiek ezarritako baldintza eta eskakizunak bete gabe.

— Umetako ustiaketarako animaliak izatea identifikatu gabe edo nekazal ustiaketa kodigo egokiarekin behar bezala erregistratu gabe.

— Animaliei tratu txarrak ematea, alferrik sufriaraziz, zaurituz edo gorputz atalen bat moztuz.

— Animaliei alferrikako sufrimendua eta kalteak eragiten dizkieten substantziak ematea zuzenean zein janariaren bitartez.

— Kalteak eragin ditzaketen animaliak behar bezala ez zaintzea eta behatzea.

— Animaliak min larriak eta nabarmenak dituela jakin eta albaitaritza asistentzia egokirik ez ematea.

— Administrazio-baimenik ez duten ikuskizunetan animaliak erabiltzea.

— Arriskutsua izan daitekeen animalia edo animalia arriskugarri bat solte lagatzea edo bere ihesa edo galbidea ekiditeko beharrezko neurriak hartu ez izana.

— Arriskutsua izan daitekeen animalia edo animalia arriskugarria identifikatzeko bete beharra ez betetzea.

— Arriskutsua izan daitekeen animalia edo animalia arriskugarritzat katalogatutakoa leku publikoetan muturrekorik gabe edo katearekin nahiz uhal ez luzagarriarekin lotua ez ematea.

— Arautegi honetan edo ezartzen den beste legerian zehazten diren bete beharreko funtzioen arabera, agintari eskudunak edo agenteak eskatutako informazioa ez ematea, informazio emateari aurka egitea, zehaztugabeko informazioa edo informazio faltsua ematea.

— Zigor espedientea hasi aurreko bi urteetan zehar hiru arau-hauste arin egin izana, baldin eta zigorra ezarri bazaio erabaki irmo bidez.

C. Arau-hauste oso larriak dira:

— Jabeak txakurtegian jasota dauden animalien ardura hartu nahi ez izatea, nahiz eta jabea identifikatua egon.

— Animaliak era bortitzen batean edo substantzia toxikoak emanda akabatzea.

— Konpainiako edo etxeako animaliak abandonatzea.

— Animalianganako krudelkeria, tratu txarrak edo animalien sufrimendua islatzen duten eszenak grabatzea.

— Baimendutako ikuskizunetan parte hartzen duten animaliei anestesia, drogak eta abar ematea, horien bidez haien berezko portaera guztiz kontrako bihurtu ahal izateko.

— Pozoitutako janaria lagatzea bide eta espazio publikoetan.

— Animaliak debekatutako ikuskizun publikoetan erabiltzea.

— Arriskutsua izan daitezkeen edozein motatako animalia edo arriskugarria den animalia abandonatzea. Jaberik ez duena, helbide ezagunik ez duena, datuak ezagutzeko identifikazio sistematik ez duena eta erroldatua ez dagoen animalia abandonatuzat hartuko da. Baita ere abandonatuzat joko da, nahiz eta erroldatua egon, bere desagertzea arautegiak ezartzen dituen epeetan salatu ez dena edo bide publikotik jaberik gabe dabilena.

— Gaitasun ziurtagiria ez duen pertsonak arriskutsuak izan daitezkeen animaliak trebatzea.

— Arriskutsuak izan daitezkeen txakur edo animaliak baimenik gabe edukitzea.

— Lizentzia ez duen norbaiti arriskutsua izan daitezkeen txakur edo animalia saltzea edo transmititzea.

— Animaliak bere oldarkortasuna areagotzeko edo debekatuta dauden ekintzetarako trebatzea.

— Animalien oldarkortasuna frogatu nahian arriskutsuak izan daitezkeen animalia edo animalia arriskugarriekin lehiaketak, ariketak, erakusketak eta ikuskizunak antolatzea, egitea edo bertan parte hartzea.

— Zigor espedientea hasi aurreko bi urteetan hiru arau-hauste larri egitea, atzera bota ezineko erabakiaren bidez ordaindu beharreko zigorrarekin.

XIII. KAPITULUA. ISUNAK

57. artikulua.

1) Ordenantza honetan jasotako arau-hausteei 60,10 € eta 15.025,30 € arteko isunak jarriko zaizkie, eskala honen arabera:

— Arau-hauste arinak: 60,10 € eta 300,50 € artean.

— Arau-hauste larriak: 300,51 € eta 1.502,53 € artean.

— Arau-hauste oso larriak: 1.502,54 eta 15.025,30 artean.

Isunen zenbatekoa urte osorako izango da eta urtero automatikoki KPI-ren arabera errebisatuko dira.

2) Arau-hauste larrien edo oso larrien kasuan instalakuntzak, lokalak edo establezimenduak denboraldi batez itxi daitezke. Arau-hauste larrien kasuan gehienez ere bi urtez itxiko dira eta arau-hauste oso larrien kasuan, berriz, gehienez lau urtez, eta animaliak erostea galaraziko zaio lau urtez.

58. artikulua.

Zigor espedientea hasita, arau-hauste gehiago egitea saihesteko asmoz, honako zuhurtasun-neurri hauek hartu ahal izango dira:

a) Animalia-aren batek ondoko zerrendan jasotako egoeraren bat bizi izan duela susmatzen baldin bada, animalia-aren zaintza eta ardura kendu egingo zaio jabeari:

— Behar bezala alojatuak eta elikatuak ez dauden animaliak.

— Albaitariaren tratamendurik gabe gaixo eta/edo zaurituak dauden animaliak.

— Pertsonentzat gaixotasun kutsagarriak dituztenak.

— Gaixotasun kroniko larri edo sendaezinen bat dutenak, gorputz atal mozketak mingarriren bat, oinaze larri eta itzulezinen bat dutenak.

b) Instalazioak, lokalak edo establezimenduak prebentzio moduan ixtea.

Zuhurtasun-neurriak ez dira etengo harik eta horretarako arrazoiak desagertzen ez diren bitartean. Neurri hauek ez dira luzaraziko espedientearen ebazpen irmoa baino areago, salbu eta ezarritako zigorrak instalazioa epealdi jakin batez ixtea badarama.

59. artikulua.

Isunak borondatezko epean zein premiamenduzko bidea erabiliz kobratuko dira, toki-araubidean ezarritakoaren arabera.

60. artikulua.

Arau-hauste arinak lau hilabeteren buruan preskribituko dira, larriak urtebeteren buruan eta oso larriak bi urteren buruan.

Arau-haustea 3.505 € baino gutxiagokoa badira, urtebeteren buruan preskribituko dira, eta bost urteren buruan, aldiz, aipatutako kopurukoa edo handiagoa izanez gero.

61. artikulua

Isunen zenbatekoa neurtzeko eta aurreko artikuluan ezarritako zigorren iraupena zehazteko, honako zirkunstantzia hauek hartuko dira kontuan:

a) Arau-haustea gizarte-mailan eta osasunean izandako eragina eta ekarri duen kaltea.

b) Legez kanpoko irabazi asmoak eta horren bitartez izandako irabazien kopurua.

c) Arau-haustea behin eta berriro egitea. Arau-haustea berriro egin dela esaten da lehendik ere, zigor-espedientea hasi aurreko bost urteen barruan Ordenantza honetako arau-hauste bat dela eta zigorra ezarri izan bada administrazio bideko erabaki irmoaren bidez.

d) Arau-haustearen gaitzesgarritasun mailan (larritasuna emanez) eragina izan lezakeen beste edozein gorabehera. Horretarako, modu berezian kontuan hartuko da adin txikikoen aurrean animalien kontra erabilitako biolentziak.

Ekintza berak bi arau-hauste administratibo edo gehiago ekartzen baditu, zenbateko handiena daukan isuna ezarriko zaio. Espedientea izapidetu eta ebazteko organo aginpideduna ahalmen zigortzailea duena izango da.

XIV. KAPITULUA. ZIGORTZEKO ESKUDUNTZA

62. artikulua.

Zigortzeko ahalmena izateko, ezinbestekoa izango da zigor-espedienteari ekitea, horretarako legeak edo bestelako arautegiek ezarritako bideei jarraituz.

Animalien babeserako 6/93 Legean araupetutako organo administratiboen eskuduntza zigortzailearen kalterik gabe, espediente zigortzaileak, Udalak, bideratuko ditu, eta arau-hausteak oso larriak direnean, eskuduntza duen Foru Organoari helaraziko dizkio. Horrek jarritako isunak udalaren diru kutxetan sartuko dira.

Arau-hauste arinei eta larriei dagozkien zigorrak Udaleko osoko bilkurak ezarriko ditu.

Ordenantza honetako edozein zigor-ezartzek ez du esan nahi zigortua erantzukizun zibiletik salbuetsia gertatzen denik.

Arau-hausteak delitu edo falta izaera baldin badu, gertatuen berri epaitegiari emango zaio eta Administrazio Organoak ez du aktuaziorik egingo.

INDARGABETZE XEDAPENA

Ordenantza honetan ezarritakoarekin bat ez datozen bestelako udal-ordenantzak, arautegiak zein bandoak indargabetuta geratzen dira.

AZKEN XEDAPENA

Ordenantza hau indarrean sartuko da testu osoa Gipuzkoako ALDIZKARI OFIZIALEAN argitaratu eta hurrengo egunean.